

Održana 30. sjednica Općinskog vijeća Ilijaš

30. aprila 2015. godine održana je 30. sjednica Općinskog vijeća Ilijaš sa 20 tačaka Dnevnog reda.

Najviše pažnje vijećnika privukla je Informacija u oblasti zdravstva na području Općine Ilijaš. Pomoćnica načelnika u Službi za društvene djelatnosti g. Sanja Zagorac-Jozić je u uvodnom izlaganju istakla da je: "2014. godina, zahvaljujući menadžmentu JU Dom zdravlja Kantona Sarajevo bila izuzetno uspješna kada je u pitanju oblast zdravstva. Ilijaš je dobio Dijabetološko savjetovište, Centar za mentalno zdravlje, 24 - satnu dežuru Hitne pomoći, stomatološku ambulantu u JU OŠ "Stari Ilijaš". U 2015. godini planiran je Projekat nadziđivanja objekta Doma zdravlja i Općine Ilijaš, nabavka ultrazvučnog aparata, kao i stvaranje uslova za otvaranje apoteke u Mrakovu.

Direktorica JU Dom zdravlja Kantona Sarajevo Prim.dr. Dženana Tanović u svom obraćanju je istakla da se: "Menadžment potrudio da stanovnici Općine Ilijaš dobiju kvalitetnu zdravstvenu zaštitu, jer je politika ove Ustanove da svi građani imaju jednaku, dostupnu zdravstvenu zaštitu. U 2014. godini mi smo ispunili sve zadane ciljeve. Potpisan je i Ugovor za nabavku rengen aparata za Centar za fizikalnu terapiju i isporuku očekujemo u skorije vrijeme, tako da će građani Ilijaša imati i tu vrstu usluge".

Dr. Sena Softić-Taljanović, direktorica JU Zavoda za hitnu pomoć Kantona Sarajevo je istakla da: "građani Ilijaša, zajedno sa građanima Vogošće i Hadžića od 01. oktobra imaju 24 - satno dežurstvo hitne pomoći i na taj način je ispravljen diskriminirajući položaj u kojem su se nalazili građani ovih općina. Hitna pomoć je imala znatno povećanje broja pacijenata tako da je ovaj Projekat pokazao medicinsku opravdanost" rekla je dr. Softić-Taljanović.

Općinski načelnik g. Akif Fazlić je čestitao menadžmentu ovih ustanova na uspješno realizovanim projektima u prethodnoj godini i upoznao vijećnike da: "Trenutno vodimo intenzivne aktivnosti na nadogradnji objekta Doma zdravlja i Općine Ilijaš čime ćemo dobiti 500 m² prostora Doma zdravlja i riješiti problem sale Općinskog vijeća i nedostajućeg prostora za kancelarije. U skorije vrijeme ćemo započeti I fazu realizacije Projekta nadziđivanja".

Vijećnici su pohvalili rad ovih ustanova, diskutovali, i postavljali pitanja operativne naravi iz ove oblasti koje će menadžmenti ustanova nastojati riješiti u narednom periodu.

Na četvrtoj tački dnevnog reda usvojena je Odluka o izmjeni Poslovnika Općinskog vijeća Ilijaš kojom je predviđeno da se finansiranje parlamentarnih grupa zastupljenih u Općinskom vijeću Ilijaš, vrši se iz Budžeta Općine Ilijaš, a prema važećoj Odluci o finansiranju parlamentarnih grupa u Općinskom vijeću Ilijaš, a koju donosi Općinsko vijeće Ilijaš.

Odluka o novčanim podrškama u poljoprivrednoj proizvodnji na području Općine Ilijaš za 2015. godinu kojom se uređuje sistem novčanih podrški u primarnoj poljoprivrednoj proizvodnji na području Općine Ilijaš za 2015. godinu dobila je potrebnu većinu glasova.

Podrške mogu ostvariti pravna i fizička lica koji su ostvarili poljoprivrednu proizvodnju - djelatnost na teritoriji općine Ilijaš i dostave dokumentaciju o ispunjavanju opštih i posebnih uslova.

Na ovoj sjednici usvojen je Nacrt Odluke o držanju stoke, pernate živine i kunića na teritoriji općine Ilijaš i uslovi pod kojim na tim područjima fizička i pravna lica mogu držati stoku, pernatu živinu i kuniće i ista se stavlja na Javnu raspravu od 30 dana i to počev od 05.05.2015. godine.

Odluka o utvrđivanju plana parcelacije i utvrđivanje novog građevinskog zemljišta za izgradnju apartmanskog naselja Ljubnići I također je dobila potrebnu većinu.

Ovom Odlukom utvrđuje se Plan parcelacije zemljišta i novo građevinsko zemljište za vanurbani dio obuhvata, a za izgradnju apartmanskog naselja Ljubnići I u Ljubnićima. Apartmansko naselje Ljubnići I se sastoji od ukupno 117 građevinskih parcela prosječne površine 400m² sa pratećim sadržajima i to: prostor naselja, zona društvenih sadržaja i saobraćajnice.

Vijećnici su usvojili i Regulacioni plan Ljubinići – Ilijaš kao i Odluku o provođenju Regulacionog plana Ljubinići kojom se utvrđuju uslovi korištenja, izgradnje, uređenja i zaštite prostora i način provođenja Regulacionog plana "Ljubnići – Ilijaš.

Podržan je i Prijedlog Odluke o pristupanju izradi Regulacionog plana "Karaula-Ilijaš" kao i Prijedlog izmjene i dopune Odluke o pristupanju Regulacionog plana "Savića brdo".

Na ovoj sjednici jednoglasno su usvojene Odluke o prestanku statusa nepokretnosti u općoj upotrebi kao i pojedina Rješenja iz imovinsko-pravne oblasti.

Vijećnici su razmatrali i usvojili Izvještaj o radu i poslovanju JKP "Vodostan" d.o.o. Ilijaš za 2014. godinu. V.d. Direktorica JKP "Vodostan" d.o.o. Ilijaš g. Belma Zukić istakla je da i pored finansijski poteškoća s kojim se ovo preduzeće susreće u 2014. godini vodopsnadbijevanje bilo uredno i kontinuirano te da je po analizama nadležnih institucija kvalitet vode neupitan. U prethodnoj godini urađeni su i infrastrukturni projekti na vodovodnoj i kanalizacionoj mreži od kojih su najznačajniji izgradnja vodovodne mreže u MZ Malešići i Ljubnićima. Ovo preduzeće je u finansijskom gubitku u iznosu od 430.006,00 KM.

Izvještaj o radu Pravobranilaštva Kantona Sarajevo za 2014. godinu nije dobio potrebnu većinu glasova.